

隨

園

全

集

隨
筆

共

隨園全書之十

隨園隨筆

待鶴老人署檢

隨園隨筆自序

著作之文形而上考据之學形而下各有資性兩者斷不能兼漢賈山涉獵不爲醇儒夏侯建譏夏侯勝所學疏闊而勝亦譏其繁碎余故山勝流也考訂數日覺下筆無靈氣有所著作惟捫摭是務無能運深湛之思

本朝考据尤盛判別同異諸儒麻起余敢披膩顏恰逐康成車後哉以故自謝不敏知難而退者久矣然入山三十年無一日去書不觀性又健忘不得不隨時摘錄或識大于經史或識小于稗官或貪述異聞或微抒己見疑信並傳回冗不計歲月既久卷頁遂多皆有資于博覽付之焚如未免可惜乃題隨園隨筆四字以存其編嘻予老矣自此以往假我數年有所觀便有所記有所記便有所筆此書之成吾見其進也未見其止也

隨園隨筆目錄

卷一

諸經類

卷二

諸史類

上卷

卷三

諸史類

中卷

卷四

諸史類

下卷

卷五

金石類

卷六

天時地志類

卷七

官職類

上卷

卷八

官職類

中卷

卷九

官職類

下卷

卷十

科第類

卷十一

各解類

卷十二

典禮類

上卷

卷十三

典禮類

中卷

卷十四

典禮類

下卷

卷十五

政條類

卷十六

稱謂類

卷十七

辨訛類

上卷

卷十八

辨訛類 下卷

卷十九

存疑類

卷二十

原始類

卷二十一

不可亦可類

卷二十二

應知不知類

卷二十三

不符類

卷二十四

詩文著述類 上卷

卷二十五

詩文著述類 下卷

卷二十六

古姓名類

卷二十七

雜記類

卷二十八

術數類

卷一 卷二 卷三 卷四 卷五 卷六 卷七 卷八 卷九 卷十 卷十一 卷十二 卷十三 卷十四 卷十五 卷十六 卷十七 卷十八 卷十九 卷二十 卷二十一 卷二十二 卷二十三 卷二十四 卷二十五 卷二十六 卷二十七 卷二十八 卷二十九 卷三十 卷三十一 卷三十二 卷三十三 卷三十四 卷三十五 卷三十六 卷三十七 卷三十八 卷三十九 卷四十 卷四十一 卷四十二 卷四十三 卷四十四 卷四十五 卷四十六 卷四十七 卷四十八 卷四十九 卷五十 卷五十一 卷五十二 卷五十三 卷五十四 卷五十五 卷五十六 卷五十七 卷五十八 卷五十九 卷六十 卷六十一 卷六十二 卷六十三 卷六十四 卷六十五 卷六十六 卷六十七 卷六十八 卷六十九 卷七十 卷七十一 卷七十二 卷七十三 卷七十四 卷七十五 卷七十六 卷七十七 卷七十八 卷七十九 卷八十 卷八十一 卷八十二 卷八十三 卷八十四 卷八十五 卷八十六 卷八十七 卷八十八 卷八十九 卷九十 卷九十一 卷九十二 卷九十三 卷九十四 卷九十五 卷九十六 卷九十七 卷九十八 卷九十九 卷一百

隨園隨筆卷一

諸經類

錢唐袁枚子才著

經文異同

說文所引經書與今本殊如觥飯爲飢飯服牛爲犢牛其文蔚也爲斐也乘馬班如爲驢如新臺有泚爲有趾既伯既禱爲既禱既禱天地綢繆爲壹壹教胄子爲育子暉暉爲彥彥殿屎爲唵呬荷蕢爲荷臾赤舄几几爲擊擊伯罔爲伯禦費誓爲柴誓平秩爲平黜斷斷兮爲留留兮凡如此類不一而足禮記郊特牲以鄉人儺爲鄉人謁仲長統以風乎舞雩爲諷乎舞雩是齋日記以浴乎沂爲沿乎沂夫人自稱曰小童爲小妾梁武帝以宰予晝寢爲晝寢古畫字卽畫字齊地無畫孟子宿于晝卽晝也韓愈論語註以吾以汝爲死矣爲吾以汝爲先矣以杖叩其脛作指其脛經經然小人哉爲經經然之人哉史記註楚狂歌而過孔子之庭孔子下欲與之言下者下堂也與之庾當作廋與簠同漢書注以艷妻爲閭妻蔡雍碑三歲貫汝爲宜汝爾雅注傷如之何爲陽如之何虞翻以康成不識古卯字誤以柳谷爲昧谷蔡雍以五更爲五叟御妻爲御妾王克以舊云刻子爲舊云孩子考靈耀以文思安安爲晏晏石經以三嗅爲三憂又爲三噫明夷左股爲左般箕子爲根滋執禮爲藝禮翦商爲戡商肥遯爲飛遯以無逸高宗享國五十有九年爲高宗享國百年集韻以鏗爾爲喚爾壹戎衣爲殪戎殷古文論語君子不以紺纁飾非緌飾也爾雅一入謂之纁是也昌黎解君子而不仁者有矣夫爲君子而不備者有矣夫高麗本論語集解以三月不知肉味三月二字乃音字之訛劉脩碑恂恂如也作遜遜如也祝睦碑作遼遼如也費鳳碑涅而不淄爲涅而不滓

論語居不容唐石經及經典釋文俱作居不容唐司戶叅軍郭京得王輔嗣手寫周易本與今異者凡一百三處如卽鹿无虞何以從禽也老婦得其少夫君子以居德善風俗之類論語問子西曰彼哉彼哉廣韻以爲彼哉彼哉呂氏春秋引夏書曰天子之德廣運乃神乃武乃文引商書曰五世之廟可以觀怪萬夫之長可以生謀與今本不同墨子尙同篇引太誓曰小人見姦巧乃聞不言發罪均今本所無孝行覽引商書曰刑三百罪莫重于不孝亦今本所無徐廣以臯陶謨擾而毅爲柔而嚮玉篇嚮馴也卽柔也其他史記漢書所引尙書與今異者百數十條不勝摘錄吳匏菴趙注孟子校本公孫丑問伯夷伊尹何如注云伯夷之行何如下又云不與伊尹孔子同道也似正文不當有伊尹二字予有亂臣十人唐石經無臣字左傳蹇叔哭師曰孟子吾見師之出而不見其入也石經以孟子爲孟兮

經註迂謬

經註迂謬者鄭康成爲甚孔融執子孫之禮以事康成猶不信郊天鼓必用麒麟皮之說以爲康成名重故多臆說若郊鼓必用鱗皮是寫孝經必用曾子家竹簡也虞翻亦極言其紕繆故駁正康成一百八十事後魏王肅尤多駁正而唐人孔穎達爲之作疏則附和穿鑿一字不敢置喙矣孔穎達本王世充舊臣其見解卑陋可想同官博士馬嘉運亦時時駁之俱載本傳余爲挾摘其可笑者如注胡然而帝也云帝五帝也孔疏便引靈威仰赤熛怒以實之註曾孫來止以其婦子饁彼南畝謂即曾孫之王后太子也成王勸農必與王后太子同行王肅疑之而孔疏遂言聖人制禮與日月同昭明明周有平王而召南詩平王之孫必以爲平正之王乃武王也明明周有成王康王而周頌成王不敢康必以爲成者成此王功非

成王也不顯成康以爲成安祖考之道改前王諡法以遂其私說註雍雍在宮雍辟雍也不諫亦入謂入宗廟也兩虛字作實字講亦旣觀止爲男女構精之構五日爲期六日不詹爲妾年未五十必與五日之御婦人過五日必有思男子而不得之病註左之左之爲陽道朝祀之事右之右之爲陰道喪戎之事註言從之邁言將自殺以從之註見乎著龜動乎四體謂四體卽龜之四體也註三以天下讓謂泰伯逃去爲一讓太王薨王季訃泰伯泰伯不奔喪爲二讓斷髮文身爲三讓註三英粲兮以剛克柔克正直爲三英何晏以必也正名乎謂正百物之名皇侃引魯君假馬之名以証之康成則以爲字義引禮記百名以上則書之于冊是也二說于夫子必也二字口氣不協余意自以朱子之說爲近註明堂位天子負斧戣而立天子周公也不稱其攝直云天子並云其冕十有二旒且曰魯之王禮也天下傳之久矣君臣未嘗相篡也禮樂未嘗相變也註君子不盡人之懽懽爲飲食不竭人之忠忠爲衣服註夢齡事云文王以憂勤損壽武王以安樂延年註大德敦化指天子小德川流指諸侯註兼葭謂刺秦襄公不行周禮註角弓毋禁辭毋從女象有姦之者禁令勿姦故毋爲禁詞一切碩人作大德解而獨以白華碩人爲妖大之人註齊子豈弟爲即齊子發夕之義訓爲闔明發行而又引古文尙書以弟爲闔必欲翻毛傳樂易之說謂與他豈弟不同註昏椽靡供以椽爲椽女子之陰此乃景十三王傳中事三代上無此刑註庭燎謂刺周不設雞人之官注東方未明謂挈壺失職註攢攢女手以爲未三月廟見故不稱婦註目上爲名目下爲清然則美目盼兮盼又是何物註撰几爲有馮佐食爲有翼然則下文有孝有德又引何禮註粵若稽古帝堯以古爲天稽古者同乎天也尤屬可怪註禮記天子一食言天子必待勸

乃再食何作僞至此註周禮袞冕用玉二百八十八斤若如此則天子之頭不勝其重註夏至祀地示必服大裘若如此則天子之身不勝其渴註喪禮含殮用米二升四合君大夫口含梁稷四升如角柶不能啟其齒則鑿戶頰一小穴而納之爲子孫者不應悖亂至此註論語皆不及門也謂不及仕進之門而失所也殊非聖人語氣其他可笑者毛萇馬融趙岐何休啖助虞翻諸人俱不能免文王在上一詩毛詩以爲文王受命而作然則文王生而謚文乎自以爲於昭于天乎馬融註文祖爲天天有文故也亦屬牽強趙岐序孟子七篇取以七者天有七政故也取以章二百六十有一者三時之日數也三萬四千六百八十五字者可以行五常施七政故法五七之數而不敢盈也何穿鑿乃爾註望道而未見言文王爲殷祿未盡故望紂而不敢誅註遁詞即秦客之廋詞與知言之旨毫無關涉禮統夏曰清臺殷曰神臺周曰靈臺何休以爲質家具天而王天神稱清文家具地而王地祇稱靈又曰質家立世子弟文家立世子子不知所本何書莊公元年經書夫人孫于齊因上文甫書公與夫人姜氏如齊故僅書夫人不稱姜氏省文也閔二年夫人姜氏孫于齊去莊公二十四年夫人姜氏入已隔遠矣不得不著姜氏以表之休遂謂殺夫罪重故去姓殺子罪輕故不去姓啖助以爲齊太岳之後而五石隕宋象桓公卒五子作亂也宋將得諸侯而治五公子之亂是鵠退不成之象故後六年霸業退象六鵠之退飛也殊覺附會孔父義彤于色者孔父之妻姜而艷古者大夫之妻當乘車不令人見其面今爲華督所見是其義從女色不形也語義亦不甚明析謝梅莊平王之孫齊侯之子註以爲平平王之孫齊平侯之子履幽人貞吉虞翻曰在獄中故稱幽人象曰幽人貞吉中不自亂也謂雖處獄中終辨得正故不自亂又童

牛之楷鄭志問木在足曰極在手曰楷今何以別答曰牛無手以前足爲手故曰童牛之楷解經至此令人失笑

經註平易

六經古註最平易者如韓嬰說黍離詩人求亡不得中心憂懣不識于物視彼黍離離然誤以爲稷之苗憂甚故也王肅訓學字爲誦習人不知不愠爲人有所不知則教誨之而不愠怒費而隱言世道違費則君子隱去天地位萬物育直指帝王顏師古以甘誓孥戮者辱之爲奴也非族誅也毛傳召公懼人因管蔡事而傷兄弟故作棠棣之詩毛氏以履帝武敏歆帝爲高辛氏蓋姜嫄從乎帝而見天也歐陽大小夏侯皆以康王之誥即顧命之下篇猶之舜典即堯典之下篇無姚方興大航頭所得二十八字也孔氏註納于大麓謂大錄萬幾之政能調燮陰陽故烈風雷雨勿迷人也無所取材謂無所取于桴材以子路不解微言故戲之朝聞道謂朝聞有道之世則夕死亦可蓋悲天憫人之意也說文以寢衣爲被方于長一身有半相合趙岐註爲長者折枝按摩也以支爲肢方于長者二字有屬注大人者不失其赤子之心即康誥如保赤子之意言治民也毛箋不日成之言不與民立日限期也中庸疏三年之喪父母適子正妻也不專主父母故更云父母以別言之註鄉人難以爲孔子慮驚先祖故朝服亦敬室神之禮也三嗅謂子路供雉孔子但三嗅其氣而不食也王伯厚以矢魚爲射魚引漢武射蛟爲証洪容齋以小星之詞即殷其雷之旨蓋使臣宵征擗擋行李不敢慢君命之意不然則牀帳衾裯非一女子所能抱而來者侯果以朋盍簪爲冠簪之簪少陵詩盍簪誼櫪馬已直用之王明齋說射侯者言矢至以此爲侯故古文作医像矢集布上

之形禮記考工皆以射中爲諸侯然則天子士大夫竟不射侯耶崔靈恩疏周禮云禪讓之時禮儀變更者少革命之時禮儀變更者多所以新人耳目此周禮之所由作也賈逵註當仁不讓於師師衆也胡廷芳註翦商爲戩商戩勤也爾雅翦慧勤也言太王勤勞以奉商也馬周以犬馬有養主人子說故疏稱臣早失父母犬馬之養已無所施明堂位云山節藻稅是天子之廟飾文仲以大夫而僭天子之禮故譏之與居蔡是兩事毛西河言樊遲請學稼是許行並耕而治之意故夫子有上好禮上好義之言若泛言爲農圃則下文無着落矣包咸解焉用稼言焉用教民稼穡也天香樓偶得解父母惟其疾之憂父母二字略讀斷其字指父母言言爲人子者首當以父母之疾爲憂蓋一則以喜一則以懼之意馬融則曰孝子不妄爲除疾病外不使父母憂也又云旅獒者酋豪也西戎無君名强者爲豪蓋遺其豪來獻方物也非獻狗也五刑有服言畫衣冠而不犯也顏息齊解賢賢易色指妻也重德不重色也子夏此章兼論五倫蓋夫妻君臣父母朋友也學則不固固陋也能學則不固陋也何休廢疾云廐焚孔子問傷人不問馬今穀梁以苞人民驅牛馬爲輕壞宮室斬樹木爲重是理道之不通也康成釋之云人民牛馬雖苞雖壞之後仍可歸還斬壞宮室樹木則不能復有宮室樹木矣故以爲重也廢疾引運斗樞曰夏不田穀梁夏田曰苗於義爲短康成釋之云之子于苗選徒囂囂此毛詩夏田之証也膏肓以左氏稱武仲爲聖爲有戾于孔子康成箴之云左氏此說譏御叔之不學非謂武仲之聖同孔子也膏肓駁左氏年鈞以德德鈞以卜以爲君之所立人必從之何事于卜康成箴之云周禮有會羣臣萬民而詢立君一條又安見其不可以卜耶袁清溪以惟求則非邦也與惟赤則非邦也與皆夫子之言非曾點問

詞蓋引求赤以証晒由爲其不讓非爲其爲邦故也若曾點問詞則點固高士不應屢解不明若是之笨清溪之說本論語古註也王厚齋註葛覃言告師氏言周禮師氏率四夷之屬以守王之門外故夫人歸不得不告也黃東發以論語見其二子焉句在至則行矣之下方與子路曰不仕無義有交合否則子路無向空舍嘵嘵之理太師摯適齊皆紂時人引漢書禮樂志紂作淫聲樂官師瞽奔散顏師古註即論語太師摯之屬曾幾解弋不射宿言孔子不欲陰中人也孫季昭解哀公問社以爲哀公欲去三桓故問社者問不用命戮于社之義宰我勸之曰使民戰栗孔子非之曰成事不說言三桓之勢已成矣不可咎其既往也白虎通以相鼠之詩爲妻諫夫也錢辛楣少詹云子夏所引夫子之言死生有命富貴在天君子敬而無失與人恭而有禮四海之內皆兄弟也六句皆夫子之言與告子張問行樊遲問仁兩節一樣語氣惟君子何患乎無兄弟也乃子夏足此一句以曉司馬牛耳嚴冬友侍讀云孟子公孫丑曰今言王若易應讀斷成句下句然則文王不足法與文理才順若然字連上讀則易然二字不成文理中庸居上不驕一節應在下節吾從周之下不驕不倍與上文自用自專方有照應與上溫故知新敦厚崇禮一節毫不連貫也張斗堂云論語古註其然指不厭三句豈其然指不言不笑不取若依朱註故作疑詞則有涉油滑非聖人口氣矣韓詩外傳甘棠之詩因在位者不卹百姓耕桑故憩甘棠而思召伯王符以行葦爲公劉澤及草木而作白虎通以相鼠爲妻諫夫之詩遯齋閒覽以尾生即微生高不知何据

說經新奇

後世說經之新者邢凱春秋通論以郭公爲草名卽布穀也引公羊以戎捷爲戎菽作証啖

助趙匡以左氏非人姓名古帝王言則左史書之故曰左氏以爲左邱明者悞也左邱明只作國語耳毛西河以春王爲春旺馮山公以爲文王自稱王而尊紂爲帝故祭公謀父稱商王帝辛其他商王無稱帝者此其証也凱風詩朱子註七子之母不能安其室本毛序也然陶淵明爲孟嘉作文云凱風寒泉之感實傷厥心孟嘉之女淵明之母引用凱風殊不可解郭琛以震用伐鬼方震摯伯明也太任父也巧言令色孔壬壬卽共工之名與三苗驩兜對稱馬融以百獸率舞者筍簞也木獸也鳳凰來儀者笙之刻爲鳳形者也簫聲之和也不然焉有朝廟中百獸能來之理程綿莊以爲誅管蔡者乃武庚非周公也故云居東二年則罪人斯得罪人者武庚以管蔡爲罪人而誅之也陳祥道言高宗彤日是祖庚祭高宗非高宗主祭也尸子以孝己有孝行而高宗惑後妻而逐之馬鄭引之以註彤日言高宗欲廢祖庚立祖甲故戒之曰典祀母豐于昵也西伯戡黎者西伯是武王非文王也甘誓乃召六卿古註天子六軍六卿皆從李子眞以爲此非周官冢宰司空之六卿天子別有六卿若當用兵之時冢宰不得統屬于大司馬三山林氏頗是其說劉質夫以紀侯大去其國大紀侯名也鄒民忠允以太姒爲文王之繼妃以大明詩曰續女惟莘續繼也曰倪天之妹明莘女之尚有姊也羅泌路史謂易彖象以三物取名易乃廬囷彖是茅犀象則取其身形相象而已崔念謨以彖爲猪喙子夏傳以井二射鮒爲井中蝦蟆陸希聲以震來虩虩爲蠅虎焦弱侯以元亨爲元享宋翟公異言論語式負版者非版籍乃喪服也古者喪服有負版綴于領下垂放方尺有八寸服傳所謂負廣出于適寸者是也鄭註負在背上適解領也喪服前有衰後有負版左右有辟領王文言曾點志于禮樂將爲舞雩之祭所云童冠者歌童也康成謂

詠而歸作詠而饋註饋酒食也又謂山梁雌雉梁當作梁孔子山行見一雌雉食其梁粟也歐陽詹以片言可以折獄乃夫子戒由也率爾之意非許之之詞曹操解吾與汝不如也以爲吾與汝皆不如顏淵也論語文莫吾猶人也晉欒肇論語駁云燕齊以勉強爲文莫蓋春秋土語耳猶之漢書江翁傳邱蓋不言齊俗以不知爲邱也方密之注沽酒苦酒也周夏官司兵註謂功沽上下疏沽謂粗惡者爲下等也方言假沽惡也不與市脯同義李穆堂解鄭聲淫作怙懣解歷引經集如詩之淫威左氏之淫于元枵禮記之母淫視聲淫及商孟子之淫辭知陷晉語之底著滯淫列子之朕之過淫矣皆不作男女嫖狎解况齊襄衛宣陳孔甯儀行父之事惟鄭鮮有聞焉安得以聲淫爲淫冶之淫乎馬融解論語爲力不同科爲力役之征有上中下三科也程大昌解子語魯太師樂乃大師非太師也周禮大宗伯官有大師有小師以瞽爲之是也樂官不合有太師猶之入海之少師陽非微子所稱之父師少師也王弼以竊比於我老彭爲二人一老子一彭祖也或又以彭爲彭咸者王充論衡以仲弓爲冉伯牛之子故夫子有犂牛駢角之喻傷其父之有惡疾而不能見用于世也毛西河以今之五倫是中庸之五達道非古之五倫六藝卽六經非射御書數也晉欒肇以予所不者之不爲否屈也言我道之所以否屈者乃天意也鄭讀舜生三十爲句登庸二十爲句在位五十爲句衛瓘讀必有忠信如邱者焉焉字連下讀言十室之邑焉知不有如邱之好學者蓋謙詞也蔡雍以王道衰微大臣知賢者隱遯故歌鹿鳴彈弦諷諫能改齋漫錄齊人呼蚬爲巨擘故孟子罵陳仲子爲蚬

摘註論語

漢人註疏好臆造典故然其時去古未遠書籍猶多所見比今人爲博且非典之典業已二千餘年則文中引用頗資博雅王伯厚摘其引漢語者作漢制考予亦雜摘數條以新耳目如論語註父者矩也子者孳也神農以十一月爲正女媧以十二月爲正帝出乎震帝伏羲也論語隱義註由也不得其死然衛蒯聵亂子路與師往有狐黯者當師曰子欲入耶曰然黯從城上下麻繩鉤子路半城曰爲師耶爲君耶曰在君爲君在師爲師黯因投之折其左股不死黯開城欲殺之子路目如明星之光曜黯不能前謂曰畏子之目願覆之子路以衣袂覆目黯遂殺之子路從而後註云孔子至蔡解于客舍夜有人取孔子一隻屐去盜者寘屐于受盜家孔子屐長一尺四寸與凡人屐異生民詩註馬融則曰帝嚳四妃上妃姜嫄生稷次妃姬訥生摯當三妃生子時姜嫄未生故禋祀求子姜嫄妊身之月帝嚳崩十月而后稷生蓋遺腹子也雖爲天所授以寡居而生子爲衆所疑不可申說知后稷之神奇必不可害故特棄之以著其神堯知其然而聽之鄭箋則云姜嫄祀郊禘時見大神之迹而履之足不能滿履其拇指之處心體歆歆然如有神道感己者也于是有身而肅戒不復御生子名棄孔疏言聖人皆無父稷契皆感天而生所以棄稷不棄契者簡狄雖吞黿仍御于夫其心自安故不棄之耳鷓鴣註云武王有疾周公揃爪投河乃書而藏之記府有人言周亂公出奔楚所云罪人斯得者周公之屬與知攝者周公出奔二年盡爲成王所得公傷之恐其刑濫乃作鷓鴣之詩以貽成王白華疏言褒氏在母腹四十六年而始生標梅箋言三十之男二十之女不待禮會而行之十月男女同巷相從夜績女功一月得四十五日有所怨則相作歌詩里正男女年六十以上共有辨護伉健者官衣食之使入民間采詩移鄉遂以達天

子漢書食貨志曾引之毛公曰嘗之日莅卜來歲之芟獮之日莅卜來歲之戒社之日莅卜來歲之稼所以興來而繼往也鄭箋春之籩之又潤濕之使趨于鑿疏稱粟一石爲糲米六斗春糲一斗爲稗九升又去爲鑿則八升又去爲侍御則七升王所食也米至侍御而細極矣毛傳凶年趣馬不秣馳道不除祭事不懸大夫不食梁百官布而不制左右布而不修車攻註云田者芟草爲防褐纏旃爲門裘纏質爲櫛間容握驅而入轡則不得入天子發後諸侯發天子抗大綏侯抗小綏戰不出頃田不出防又取禽獸以左膘右腠之射中處分上殺下殺面傷不獻不殺降也不成禽不獻哀幼也凡輦有一斧一斤一鑿一耒夏后氏二十人而輦夏曰余車殷曰胡奴采薇註云西伯將遣成役先與之期以采薇之時今薇生矣先輩可以行也鴛鴦章註云古明王所乘之馬繫于廐無事則委之以莖有事乃與之穀甫田詩註云甫田丈夫也太古之世以丈夫稅田哆兮侈兮註引顏叔子獨處隣婦遭雨室壞趨之叔子納之使執燭放乎旦而蒸盡縮屋而繼之自以爲避嫌之不審矣若其審者宜若魯男子矣孔穎達疏關雎云舜不告而娶故不立正妃夏增以九女殷增以二十七爲三十九人箋宛邱章謂胡女大姬無子而好歌舞巫覡註釋引孔安國云古者佃魚不食因衣其皮先知蔽前後知蔽後後王易以布帛而猶存其蔽前卽釋也註妻舜引帝王世紀云舜三妃娥皇無出女英生商均次妃癸比生二女一霄明一燭光文王受命註引元命苞禹觀河見長人臯陶在洛見黑公舜爲太尉與堯坐舟中見鳳凰含圖置軒轅前黃帝再拜受之湯登堯臺見墨鳥文王坐靈臺見赤雀含丹書止于戶武王伐紂有白魚入舟化爲赤鳥以穀俱來伐崇註引外傳天黿卽女枵星齊之分野太姜之祖也有逢伯陵者殷之諸侯封之齊地逢

公之死其神憑焉周出于姜姓故爲外祖所助遷社疏云湯伐桀時旱致災明法以薦猶旱至七年故湯遷社以周棄代之欲遷勾龍以無可代之者于是乎止啟征註云有扈氏爲啟庶兄賢堯舜而薄禹以爲不讓賢而傳子故啟伐之說命註云傳說蒙胥靡之衣入高宗之夢云我徒也姓傳名說天下得我者豈徒也哉武丁悟而推之曰傳者相也說者悅也天下當有傳我而悅民者明以夢示百官皆非也乃使工寫其形求諸天下果見築者胥靡衣褐露索役于虞虢之間禹作司空註云堯時冬官爲共工知禹有聖德必成功故改名司空以官名寵之非常官也至禹登百揆之任捨司空之職爲共工與虞故曰垂作共工益作朕虞洛誥註引書傳稱周公將作禮樂優遊之三年不能成君子恥其言而不見從恥其行而不見隨將大作恐天下莫我知將小作恐不能揚父功業乃營洛邑以觀天下之心于是四方諸侯率其羣黨各攻位于其庭周公曰示之以力役且猶至况道之以禮樂乎然後敢作禮樂康成言太王遷岐一年成邑三年五倍其初註彌成五服以爲禹之疆土三倍于堯尙書正義曰舜耕歷山夢眉長與髮等宋書符瑞志曾引之鄭康成解四岳云四岳者羲和羲仲四人之子也四人之子又爲八伯盤庚註言祖乙奢侈乃謀徙湯之舊都故首篇是盤庚爲臣時所作與史記云盤庚崩後百姓思盤庚乃作盤庚三篇之說不同周官註引緯書云泰山失金雞西嶽亡玉羊帝乙歸妹註云京房載成湯嫁妹之詞曰無以天子之尊而乘諸侯故帝乙歸妹子夏傳以爲湯嫁妹也春秋註引孔子云我志在春秋行在孝經九月大雩註引古之人重請請乎應上公應上公者古之神人通乎陰陽者其雩之祝詞曰寡人當死百姓何謗願撫百姓以塞無狀魯郊以丹雞祝曰以斯翰音赤羽解魯公之咎西宮災註云魯